

Mbanjrungbungz:

Gingjsaek Ndeiyawj Hekyouz Haengjgyaez

弄朋特色景观令游客流连忘返

□ Siuhgwz Hungzlieng ingj

Daj giz sang yang zibai gwaen aenmbanj.



▲ Aenmbanj siengnyemh ndaw doenghnaz.



▲ Ndaw mbanj gizgiz raen miz diemq hekninz.



▲ Vunzlai gyawjgyae comz ndaw mbanj angqyangz gvaq ciet.



▲ Vunzmbanj yienj caij maxfaex.

Doengh bi neix daeuj, Dasinh Yen Ganhhih Yangh Mingzsw Cunh Mbanjrungbungz haenqrenz caux-guh "aenmbanj fungsug daegbied daegsaek yienhda" miz fungcingz henzguk ndeu, youq dangvej cwngfuj baihgwnz sonyinx caeuq haeujcoengh lajde, gaenxmaenx gaijndei yiengh mbanj, banh "nungzgyahloz", dawz henhoh nem hwngfat aen mbanj saujsu minzcuz caeuq lajmbanj liyouz, "Guengjsae gyaendei · swnghdai lajmbanj" giet-hab hwnjdaej, gyahung gij mingz-daeuz caeuq doxnangq binjbaiz aenmbanj daegsaek saujsu minzcuz, ndaej haemq ndei doidoengh henhoh caeuq swnjcienz vwnzva saujsu minzcuz. Bi 2014 Mbanjrungbungz ndaej bingz guh "Cungguk aenmbanj daegsaek saujsu minzcuz", bi 2015 ndaej aen mingzdaeuz ndei "Guengjsae aenmbanj okmingz gingj-yawj daegsaek liyouz".

Mbanjrungbungz dieg youq gyangsim Ginggih Liyouz Doenghnaz Mingzsw, gungh miz 61 ranz 270 lai vunz. Gaijgwz hailangh gvaqdaeuj, Mbanjrungbungz couh itcig dwg Ganhhih Yangh aen mbanj guhdaeuz baenzfouq ndeu, gyawj geij bi neix cix leihyungh gij swyenz youhsi youq ndaw ginggih okmingz de, comz ngaenz guh yiengh mbanj gaij moq gunghcwnz, haenqrenz hwngfat

"nungzgyahloz" daegsaek liyouz, doenggvaq beuj sauq nyapnyaj, bu roen suijniz, gaij raemx gaij diengzhaex, hawj yiengh mbanj bienq moqsag, baenz aen baenz aen ranzlaeuz cang ndaej gyaueget ndeiyawj haenx youq ndaw faexheu cazva loq raen loq mbouj raen, gij diemq hekninz diemq gwnngaiz gig miz daegsaek Mingzsw haenx gizgiz raen miz. Vunz ndaw mbanj dingzlai bae guh hong fugsah liyouz, mbanj hai diemq hekninz, mbanj banh "nungzgyahloz", mbanj guh daujyouz daihhek doenghgi hong neix, souhaej bi beij bi lai.

Geij bi neix daeuj, ndaw yienh lij sonyinx vunzlai Mbanjrungbungz ciengx bitcaw ndaem haeuxhom Mingzsw doenghgi canjyez daegsaek neix, daengx mbanj gungh ndaem haeuxhom youhciz 270 moux, moix bi ciengx bitcaw 8500 lai duz. Doengzseiz lij yungh seizdoeng naz hoengq ndaem byaekgve, vabyaekyouz, luzfeiz doenghgo neix 200 lai moux, hawj ndaw naz heuswd gyaendei.

Mbanjrungbungz baengh dieg youq gyang ginggih caeuq gij liyouz swyenz ndei de gaenxmaenx hwngfat "nungzgyahloz", seizneix ndaw mbanj miz 17 ranz caeuq 20 ranz mbanj henzgyawj Mbanjrunghdaeuj, Mbanj-nazyiz doxgyoeb banh baenz le

diuz gai "nungzgyahloz" ndeu, hawj gyoengq hekyouz haeuj mbanj le ndaej cimz gwnz byaekngaiz nungzgya, comz naengh iengjring, lij ndaej bae ranz nungzgya youq, daejniemh saedceij nungzgya, doengxhaemh lij miz eu fwen, diuqfoux biujyienj dem, ndaw mbanj ngoenz beij ngoenz nauhyied.

Youq hwnjguh aenmbanj daegsaek saujsu minzcuz ndawde, Mbanjrungbungz lij yawjnaek cimhra, henhoh caeuq hwngfat vwnzva minzcuz, ranghdieng aen mbanj neix ciet hawfwen ndawbiengz ceiq hoenghhwd haenx, caemh heuhguh "cietroengzdoengh", dwg moix bi liggaeuq ndwencieng ngeihloeg, moix daengz ngoenz de, gyoengq vunzmbanj gyawjgyae rangh neix cungj daenj ndangdaenj minzcuz moqsag lwenqda comz daengz ndaw Mbanjrungbungz, eu fwen doiq fwen, raen youx ra youx, guh'angq guhcaemz, nauhyied hoenghhwd; moix bi cietfwen sam nyied sam, gyoengq hekyouz caemh doxiu doxcaeh bae daengz Mbanjrungbungz, caeuq vunzmbanj daem ceiz guh ceiz, naengj haeuxnaengj haj saek, diuq fouxfaexsoux, eu fwen ciengq go, youq ndaw angqyangz gamjsouh gij fungcingz vwnzva minzcuz daegbied de, caemh roxnyinh mizyinx raixcaix.



▲ Bakdou hung aenmbanj miz daegsaek.



◀ Eu hot fwen singsang coux hekyouz.

▲ Hekyouz naengh bez yawj gingj.